

# Cussegl grond vul dapli trasparenza

Resultats da votaziuns publitgads en l'internet

■ (anr/fa) En avegnir po guardar mintgin sin la pagina d'internet dal chantun co ch'ils singuls deputads al cussegl grond han votà. Cun 103:7 vuschs ha acceptà il parlament questa revisiun parziala da l'urden da gestiun dal cussegl grond. Dapi l'atun 2012 vegn fatga la gronda part da las votaziuns dal parlament grischun cun agid da l'indriz electronic. Ils resultats vegnan inditgads sin ils moniturs en la sala dal cussegl grond e sin tribuna. Ils resultats da las votaziuns finalas vegnan registrads. Tgi che vul po empustar quests resultats tar il secretariat dal parlament grischun. Quel al trametta alur ils resultats per posta. Causa che l'interess per questa purschida existiva mo al cumenzament ha fatg l'onn passà, durant la sessiun da zercladur, la fracziun da la ps la dumonda da publitgar en avegnir questas datas sin la pagina d'internet dal chantun. Cun 99:4 vuschs ha sustegnì la maioritad dal parlament questa dumonda. Sco cumissiun predeliberanta è vegnida nominada la conferenza da presidents.

## Sco tar la confederaziun e divers chantuns

«Dad ina vart han ins vis che nossa metoda actuala da publitgar ils resultats da las votaziuns en il parlament na s'ha betg verifitgada», ha ditg *Duri Campell* (pbd, Engiadin'Ota), il president da la cumissiun predeliberanta, «alura èsi

dentant era da dir che tant la confederaziun sco era blers auters chantuns pratitgeschan gia il sistem da publitgar en l'internet ils resultats da las votaziuns e co ch'ils singuls han votà.» Perquai è vegnida la cumissiun a la con-



Il cussegl grond vul stgaffir en il futur dapli trasparenza.

clusiun ch'i saja dretg da render en l'internet accessibel al public ils resultats betg mo da las votaziuns finalas, mabain da tut las votaziuns. Sin incumbensa da la conferenza da presidents ha il secretariat dal cussegl grond laschà examinar tras experts sche quai saja tecnicamain pussaivel. Quels èn vegnids a la conclusiun che la realisaziun da l'incumbenza dal cussegl grond saja pussaivla cun l'indriz da votaziun electronic existent. «Cun mo 24 uras retard vegnan ins a chattar las datas sin la pagina d'internet.»

Senza cuntravusch ha il parlament decis da tractar questa revisiun parziala da l'urden da gestiun dal cussegl grond. *Bernhard Niggli-Mathis* (pb d, Aschera) ha declarà ch'el saja cunter questa revisiun: «Ins vegn uschia reducì sin quels che din gea e quels che din na», ha el argumentà, «mintgatant din ins na, era sch'ins sustegna l'intent d'in affar politic, ins fiss però da l'avis ch'ins duess ir pli anavant.» Che la populaziun na vesia uschia ils motivs, pertge ch'in deputà, deputada di gea u na a l'in u l'auter affar.

La gronda part dal parlament era dentant dad auter avis: Cun 103:7 vuschs ed ina abstenziun da la vusch ha acceptà il cussegl grond la revisiun parziala che pussibilitescha en l'internet la publicaziun dals resultats da las votaziuns dal parlament grischun. Quella revisiun entra en vigur l'emprim d'avrigl 2015.